

1 Píta

Ebeq sáhnsahwe ahtebé ehwehne.

Sísa tagariáh ké mó mapéq mó mapérue abae aguwana Pítaga mi keyábé iwíahéna mah pahsí sehiranúwe. Mah ebéqté páhsíípéq sehiranéna, Íre kaweq sunúq iteba sínaraq Sísane sánsá ambubu atawéq kawerue sehgóro. Sísa tagariáh kéráq wahnahno kegá mi keyábé arutaboirue pehwehrue wahnahnarítáhro. Manikánka píribahri ke íre séhréhia peh ahqáho aritéhre. Owainawansabé anotahtaq ahqáho atáhro ue sehiranúwe. Sísa tagariáh kégá wene sánsá kawerue sehgeheéna Pítaga mah pahsí sehiranúwe.

Pítaga ebeq sehiranú pahsíe.

¹ Íné Pítane páhsí sáhnsahwe tagahro. Sísa Karáhéga íné omaq intena eqmaq nuwowe. Ite Sísa tagariáh ké méq Asiu ke méq wáhnaupéqté kéné marakórapéq mía míao ke wóe. Ite Póntúsa marákórápéq Kárétía marákórápéq Kápárósia marákórápéq Esia marákórápéq Pítínia marákórápéq mía míaowe.

² Maniká Iteriboga iwíahue ite omaq itowana Sísa Karáhéga wene korahqtaté itene irupipeq kaweraitaráire. Kaweraitaráirana wene ehweh sehgieq wene kaweq anímári míageheéna Manikáne Awanka séhréh aitéhre. Maniká Iteriboga itene iru ukiq itena anotahtaq séhréh aitéhre.

Íópeq oga mérapeqsábé áwénuné ehwehne.

³ Itene Wahnah Sísa Karáhéne Abowá, itene Manikánsabe iwiáh iwiáh atone. Manikánka itensabé anotah arútábóíri puana Sísa Karáhé pukúwana iriwe organúq atotaq ite moq organúq itowe. Minayabe ite oga mía míaoneheqmúne iwiáhúne.

⁴ Íópeq pokona tanáhráq Maniká Iteriboga omaq itena áhnte kaweq naneqmarí náinkéhe. Wega mi naneqmarí íópeq sáharéhrana mitaq íre kambarékia peh kaweqtaq kagaire. Minawari awaq meyabe itene iru eyoyóue áwénunúne.

⁵ Itega Sísansabé aiq pútare atona puana Manikánka amahnága págegeue wahnahnaitahnaq mókake kaweqtapéq awaq mianéhe. Anehe tanahráq Manikánka ite airaiq kaweraitahna tanáhráqsábé áwénunúne.

⁶ Mókake ite airaiq kaweraitahnayabé iru eyoyóue míáhwe. Amahnága pehgáriq tanáhráq íre kaweq sunúqká ite áhwárawe tagéna kamah aíre.

⁷ Minayabe íre kaweq sunúq iteba sínaraq itega Sísane sánsá ambubu atawéq peh kawerue sehgírataqmé minawé kaweq sansáne.

Minawé wehukega ebah moné mirao sansá tahnsane. Móne mirao naneq ebáh áwíq kórae. Wehukega mi ebáh kaweraraneheéra iraipéq parearáhwana abehq náneq tagirana anehe peh kaweq korawé kékhe. Itega Sísansabé kawerue aiq pútare atáhnká mi kawéq ebáh kiotaqme peh kagaire. Kórawe íre kagaorahi nanere. Íre kaweq sunúqká áhwárawe tagáhnaraq itega Sísane sánsá ambubu atawéq peh kawerue sehgírataq mókake

Sísa Karahéga tuinagake itensabé, Kawerowe éna anotah anímári míáhro aitankéhe.

⁸ Itene iuranka Sísa íre tagéq pehipi wensabé irutaboirowe. Amahnága itene iuranka Sísa íre tagia pehipi wensabé aiq pútare ateq anotah-taq iru eyoyóue iwíáh iwíáhowe. Iru eyoyóinsabé irareyabe itene ehweh íre awehraq kékhe.

⁹ Itega Sísansabé aiq pútare atáh púana Manikánka itieuwa kaweraitéhre.

¹⁰ Manikáne Awanka sokigi ariu ehweh pahsuq pahsuro kégá ite kaweraitéhre ehwéh naho iraruwe. Iraréra, Wega árahue kaweraitehrámo iwíáhéra áwahe kabaréra kasenuwe.

¹¹ Sísa Karahéne Awanka iwíáh aritowara sega Karahé éhweh iraréra we érínana anehe anotah aní úkína ehwéh iraruwe. Iraréra, Ite meirahna anínká aneq tanáhráq tuinabomo? Mi tanáhráq aneq ábóarinabomo iwíáhéra,

¹² Itega irarúna ehwéhmé íre ite oga mé tanahráq peh mó tanáhráq aiq pútaragínara mó kegá tagagehe uwe. Naho sega aiq pútaq ehwéh iraréra sehiranurowaq itega amahnága írátiáhwe. Manikánka Wenawa íópeqté eqmaréhrana kaweq ehwéh tei teino ke págege arítéhrara aiq pútaq ehwéh tei teinowe. Mah ehwéh íópeqté kégá moq ahtebýabe suwahbehre.

Manikánka ite kaweetaq míageheéna omaq itéh éhwéhne.

¹³ Minayabe itewe tábúsoqme iwíáhue kaweq sansánoro. Sísa Karahéga tuina tanáhráq anotahtaq séhréh aitankéhe. Minayabe iwíáhue áwénunoro.

14 Ite múgu wahguue míarotaq itene ahbabáq iwiáhgá saiqnariaraire. Amahnága mi ahbabáq íwíah sueq

15 Manikáne animári míah púaq wene sánsá kawerue sehgóro. Ite omaq itéh ání ahriahri kaweqtaq mía míainserah ite moq kaweqtaq méq moke mirao sansá kaweq sansánoro.

16 Minayabe Manikáne ehwehnka aiq mahraréna,

Íné kaweqtaq mía míau puaq ite moq kaweqtaq mía míoro ire. *(Wok Pris 11.44-45)*

Manikánka anotah apéqtátē ite paiqmaro ehwéhne.

17 Iteriboe atahwe. Wega peh morá íwíahue ómi wehukene arambehri age-haqme tagéna sainsúéhre. Minayabe itega mah marákóípéq míah tánáhráq wensabé áhtenoro.

18 Iteriboe itene igaqnáréhne abehq sánsá sehgironka saiqnariowe. Manikánka anotah apéqtátē paiqmaronka saiqnariomé sabiruowe. Ite aiq tagariáhmé móneakáq ménsáme hnsánkakaq abehq úkorahi naneq puana wega minarate íre paiqmarowe. Írakaumo.

19 Sísa Karáhéga itene ahbabáqsabe pukúwana Manikánka Sísane kaweq koráhqtátē ite sabiru-anieéna paiqmarowe. Sísawe awaho sipísípíq áráhq tahnsa ména itene ahbabáqsabe pukúwe.*

* **1:19:** Manikánka sene ahbabáqsabe kaweraritankeheéra Ísara kegá sipísípíqtátē Maniká titiratowe. Awahreéna soriqnahnú sipísípíq íre subisa peh awaho mío sipísípíqtátē titiruwe. Wok Pris 22.17-25 tagáhno. Pítaga mi sansá iwiáhéná, Sísawe awaho sipísípíq áráhq tahnsa míéhre ue sehiranúwe.

²⁰ Manikánka mah marákó márakkó íre mirarotaq ite meirankeheéna Sísa omaq atowe. Ite séhréh aitankeheéna marakóipeq ábóraraginkehé úwana ábóraruwe.

²¹ Wega ite séhréh aitáráinsabé Manikánsabe aiq pútare atáhwe. Sísa pukútaq Manikánka iriwe organúq atena wensabé, Anotah aní míahno atowe. Miraúnsabe itega Manikánsabe aiq pútare ateq wene omasa éhwéh moke mirainkéhe íwíáhéq minayabe áwénunowe.

Sísa tagariáh kékáyabé kawerue irutaboiroro i ehwéhne.

²² Itega aiq pútaq ehwéh ireq kawerue sehigronsabé kaweqtaq míahwe. Kaweqtaq méq mó Sísa tagariáh kékáyabé kawerue irutaboiroro. Sensabé pehgáriqtaq irutaboiriyehboq anotahtaq irutaboiroro.

²³ Manikáne ehwehme organúq itahráhi ehwéhnéna ahriahri kagainawire. Itega mi ehwéh ireq aiq pútare atáh púana Manikánka irupipeq o awá maqitáráire. Iteiuwa íre pukorahiraq peh ahriahri mía míaoneheqmóe. Manikáne ehweh kagainsabé

²⁴ wene ehwehnka mahraréna,
Mah kehiná kékíná peh wahto tanahráq mah marákóípéq míahwe. Se uworapeqté náneq tahnsá míahwe. Segá iwíáh íwíáho naneqme peh uworapeqté wéhgánáh ára tahnsáne. Uworapeq kíréh náneq ehyatagirana árame pururuqnaqire.

²⁵ Itene Wahnhahne ehweh mina tahnsa íre miraia peh ahriahri kagainawire ire. *(Aisaia 40.6-8)*
Mah ehwéhmé aiq tei teino kaweq ehwéhne.

2

Ite sunkíkírirabeqte meiqmena téhrehrabeq móito ehwéhne.

¹ Manikánka o awá maqitárái puaq moke íre kaweq sansá súáhro. Péhe éhwéh irareme, moke péhe sánsámé, mó kené ménsámhensánsabe igará pabekime, éhruru ehwéhmé, mi sansámári moke súáhro.

² Inahunah anínká náhnsabe arutaboiréna nehnserah Manikáne ehwehnsabé irutaboiroro. Itega mi ehwéh ireq sehgírataq págegeue míahrahowe.

³ Minayabe itene Wahnahnka kaweraitéhmé ahtebéq iwíáh iwíáhowe.

⁴ Sísa itene Wahnah oga mía mía wahq tahnsa míre. Weba sero. Áhnte kegá wensabé, Iuwahriehre atówana Manikánka wensabé, Are omaq atóge éna, Arega moke mó ke kiotaikóna aní móne úwe.

⁵ We itene oga mía mía wahq tahnsaniraq weba séq wene nahwiahnsanse tahnsá míagehe. Minayabe Maniká Iteriboga mi nahwíáhnsánsérátē wene nah pearankéhe. Ite mitaq Manikáne mibeq mahbeq arítáh ké méq Sísa Karáhéga miraúnsabe Manikánsabe kaweróne ateq wensabé iwíáh iwíáh ataneheqmóe.

⁶ Minayabe Manikáne ehwehnka aiq mahraréna,

Írátíáhro. Sáíóna sawéhrápéq néne nah pearanié. Omaq ato anínká mitaq kaweq wahq tähnsá

míankehe.* Wensabé aiq pútare atáh kégá
anehe íre siyehitanawire ire. (*Aisaia 28.16*)

7 Wensabé aiq pútare atáh kégá, We anotah kawéq
ánine íwíáhowe. Wensabé íre aiq pútare atáh kékabé
Manikáne ehwehnka mó mahraréna,
Nah piáh kégá suto wahqká moke nahwiahnsanse
kiotaikire ire. (*Buk Song 118.22*)

8 Manikáne ehwehnka mó mahraréna,
Mi wahqmé wehuke siyobeq patame
inahnsuboráhowe. Wehukega wahqtáq
siyobeq patame surahoneherawoe ire.
(*Aisaia 8.14-15*)

Wahqtaq siyobeq patame inahnsubónserah
Manikáne ehwehnsabé iuwahriehre e kewé
ahbabárowe. Naho Manikánka iwiáhéra, Mókake
mi kegá néne ehwehnsabé suwahríahnaraq
ahbabárighe úwe.

9 Itewe mina tahnsa íre owe. Manikáne kaweq
animári wenkahnáh míageheéna omaq itowe.
Itene Wahnahne mibeq mahbeq arítah ké
míageheéna ite omaq itowe. Wega séhréh aitéh
árámbéhrí teri terinigeheéna ite omaq itowe.
Menah ite sunkíkírirabeq míarowana Manikánka
itensabé, Máhoro urairaq itega mitaq sueq wene
kaweq téhrehrabeq kowíarowe.

10 Menah íre kaweq ke méq amahnága ite
Manikáne animári míáhwé. Menah wega kamah
aieráhuraire. Amahnága wene animári míáhnsábé
íre kamah ainkéhe.

Peh kaweq sansá sehgiioneheqmúne i ehwéhne.

* **2:6:** Káríki ehwéhmé íre wahqtaq pabeqme peh ebahtaq
pabeqme ehwéh mirarire.

11 Néne iyahnabo anímáríno, néne ehweh teiníboq kawerue íráhro. Ite wáhnaupéqté ké suwahpeq tahnsá míáhtáq sene ahbabáq íre sehgiówe. Mina onserah itene irupipeqté áhbábáq íwíáhgá iteiwa áúgi ínehoéq íre sehgira peh ahqáho atáhro.

12 Sísa íre tagaríah ké míáhrabeq tábúsoqme sansánéq kaweqlaq mía míaoro. Segá itensabé, Ahbabáq ke woe aitéhrataq itene kaweqlaq sansá tagéra mó iwiáhéra itensabé, Peh kaweqlaq sansáno ke wóe aitagéhe. Mira iwiáhirataq Sísa tuinagake segá Manikánsabe iwiáh iwiáh atagéhe.

Wahnahno kené ehweh íráhro i ehwéhne.

13 Itene íópeqté Wáhnáhnsábé iwiáhéq mah marákóípéq wahnahno kené ehweh íráhro. Kámáhni wahnáh ánínseq wega eqmaréh wahnáh kéréqne ehweh íráhro.

14 Kámáhni kegá ahbabáq ke kamah ariera kaweqlaq sansáno keyábé, Kawerowe arítáhwe.

15 Maniká awahbeh sansá sehgióro. Kaweqlaq sansá sehgióro múguwahgu kené íéhruru ehwéh saiqnaruagéhe.

16 Umehga íre saiqnariéh ké tahnna míáhro. Mó naneqka ite íre saiqnariéh púaq, Pehipí ahbabáronéhe iwiáhiyehboq Manikáne arambéhrio ke míáhro.

17 Moke ómiyabé iwiáh iwiáhoro. Sísa tagaríah keyábé irutaboiroro. Manikánsabe áhtenoro. Mah marákóípéqté wahnáh keyábé iwiáh iwiáhoro.

Sísaga kaweqlaq sansánuñserah itega moq miraoro i ehwéhne.

18 Mó kené arambehri arítáh kéo, itene marakóipeqté wáhnáhnsábé iwíáh íwíáhqué wene ehweh kawerue íráhro. Íre peh morá kawerue séhréh aitáh wáhnáh kéné ehweh íráhro. Írakaumo. Págegeue wahnahno keyábé áhtenéq sene ehweh moq íráhro.

19 Mó kegá kamah airaq kaweç sansánirataq Manikánka itensabé, Kawerowe aitankéhe. We awahbeh sansá mirao puana wega itensabé, Kawerowe aitankéhe.

20 Itega ahbabáriransabé mó kegá iubiqme kamah airataq kawerowe íre aitahráhi mino. Kaweç sansánirara mó kegá kamah airataq Manikánka itensabé, Kawerowe aitankéhe.

21 Itega kaweç sansá miraigeheéna Manikánka omaq itowe. Sísa Karáhéga itene ahbabáqsabe putiotaq wene arrupipeq umeh ague wene anonka érúwe. Wega kaweç sansánúnserah itega moq miraoro.

22 Sísaga íre ahbabárúwe. Wega péhe éhwéh íre irarúwe.

23 Segá we abehq éhwéh atótaq wega sensabé íre síwíwiowe. Segá we áwíoqnowana érútaq wega sensabé, Mókake kamah ainauge íre irarúwe. Írakaumo. Manikánka tábúsoqme agehmarena sainsuanawire éna, Wega íné kawerue wahnahnaintankéhe íwíáhúwe.

24 Itene ahbabáq sansa sueq kaweqtaq mía míaigeheéna Sísa Karáhé awankátaq táhpawé pukútaq itene ahbabáqmari wene anonkataq moke meyowe. Sísane anonkataq purambura agúnka ite kaweraítowe.

25 Itewe sipisípiqka wene ah suena peh tanahraipéq móbuq mahbuq inserahnurowe. Amahnága itene Wahnahpa kouwekowana wega itieuwa kawerue wahnahnaitéhre.

3

Weh ahreyabé éhwéhne.

1 Ahrerono, iteruwehqsona ehweh kawerue íráhro. Iteruwehqsonka Manikáne ehweh íre aiq pútare atéhrataq itene kaweq sansá tagagehboq sene ehweh íráhro. Íre itega teríra ehwéhnsábé peh itega kaweq sansánira tagéra, Íné moq Sísa kéraníe íwíáhigehe.

2 Iwíáhéra, Néne ahregá kaweqtaq mé sansáni púana, Íné moq Sísa kéraníe íwíáhigehe.

3 Ahrerono, awahriq naneqsabé íre irutaboiroro. Kaweq korósíyábé itene iyahra kaweré naneqsabé moke awahriq naneqsabé íre irutaboiroro. Íre arene anonkataq awahriq naneqsabé

4 peh morá itene irupipeqté kaweq iwíáhyábé irutaboiroro. Kaweq iwíáhirataq iru pehwehrue mía míorahowe. Minawé Maniká awahbeh sansáne.

5 Naho Manikánsabe aiq pútare atera wensabé iwíáh iwíáh ató ininsónká mi sansánéra sensuwe-hqsone ehweh írówe.

6 Ébáráhmane ahre Sárahga wenawehqne ehweh sehgienna wensabé, Néne wahnah mone atowe. Ahrerono, itega kaweq sansánéq mó naneqsabé íre áhreirataq Sárahne ayahunkawa tahnsa míagehe.

7 Weho, itene ahreronsábé iwíáhhéq sereq kaweqtaq mía míaoro. Itereq itene ahreronseq oga mérapeq moráráq awaq miagéhe. Ahreroneé sinonkame íre págege wehne sinonka tahnsáne. Minayabe itene ahreronsábé iwíáh iwíáhquéq pehwehrue arítáhro. Mirairataq Manikánka itene púreq ehwéh irankéhe.

Ahriahri mó ke kaweq sansá aritanéhe i ehwéhne.

8 Amahnága teiú éhwéhnkákáq kawerue íráhro. Ite ómiga peh morá iwíáhoro. Moke Sísa tagaríah kékabé irutaboiréq we séhréh atéhoro. Píribahri iyehboq uwaresa ké míáhro.

9 Are ahbabáratahna aní ahbabáratéhneho. Arensabé ehbonawi anínsábé íre kaweq ehwéh atéhneho. Ahbabáq sansa pehragé are ahbabáratahna anímé Manikánsabe, Séhréh ate kawerato ue púrerúno. Miraigeheéna Manikánka ite omaq itena íáhrabúwe. Itega mó ke séhréh ariteq kawerarítéhrataq Maniká Iteriboga itensabé, Kawerówe aitená séhréh aitankéhe.

10 Minayabe Manikáne ehwehnka aiq mahrraréna,
Oga méyabe irutaboiréq kaweqtaq méyabe
irutaboiro keo, ahbabáq ehwéh sueq péhe
éhwéh íre teríero.

11 Ahbabáq sansa sueq kaweq sansánoro. Peh morá iwíáhquéq iru ukiq itahráhi sansánsábé irutaboiréq sehgioró.

12 Itene Wahnahnka kaweqtaq mía míao ke tagéna sega púrero ehwéh ahriahri irena peh ahbabáq sansano keyabé abiahnsa arítéhre ire. (*Buk Song 34.12-16*)

Kaweq sansánirataq iru eyoyóue míahrahi ehwéhne.

¹³ Itega kaweq sansánsábé irutaboiréq sehgírataq inseréhga kamah aigéhbo?

¹⁴ Itega kaweq sansánirara mó kegá íwíoqnehrataq iru eyoyóue míáhro. Íwíoqnehra keyábé áhreéq itene irupipeq iwíáh kikiriyeho. Írakaumo.

¹⁵ Itene irupipeq Sísa Karáhénsabe iwíáh iwíáhquéq, We itene Wahnah mire iwíáhoro.

Mó kegá itensabé, Itega ogá mía míaoneheqmúne íwíáhome aneqsabé mira íwíáhoo éra ahkakebopoq kasenigehe. Kasenirataqmé tábúsoqme terienehequéq íwíáhue mi ehwéh kaweroro.

¹⁶ Kaseno keyabé ehweh ayahqmarahnaraq mi keyábé iwíáh iwíáhquéq pehwehrue terio. Kawequeqtaq mía míaor. Kawequeqtaq mía míaéq Sísane kawequeq sansá sehgiónsábé mó kegá íehruru aitéhrataq sega anehe iwíáhirame siyehitanae.

¹⁷ Itega kawequeq sansánúnaraq Manikánka kowe aritahnara mó kegá íwíoqnehrataq itega kawequeq sansánúna puana aiq kawerire. Itega ahbabáq sansanúnaraq mó kegá kamah aírataq ahbabáq sansanúna puana íre kawerire.

Sísaga itene ahbabáqsabe pukéna irigue organukú ehwéhne.

¹⁸ Sísa Karáhéga miraúnsabe iwíáhoro. We ahri-ahri kawequeqtaq mía míairaq itewe íre kawequeqtaq mía míau. Wega Manikánseq itereq insahwé aitanieéna peh morá tánáhráq itene ahbabáqsabe pukúwe. We móñkakáq íre pukinae. We pukútaq

wene anonka pukúwana Wenawame íópeq peh oga míéhre.

¹⁹ Oga ména pokue wene ehweh íre sehgiú kene siwamarí karábúsiipéq míotaq kosíwáhnorúwe.

²⁰ Mi ke oga míotaq wehukení wenawíq Nóah marakóipeq míowe. Nóah míotaq mi kené ahbabáq áhnte agúwe. Áhnte aguwana Manikánka íre apubúue kamah ariuwe. Írakaumo. Peh síwénunúwe. Síwénunúwana Nóahga sípi aiq mirarowana anotah ibónsúnka mi ke wánínuwe. Wánínuwara peh Nóahreh karíronání abapete apahtáró ké méra sípiipéq kibekuwe. Kibekuwana wání piotaq íre pukia peh kaweqtaq míowe. (*Stat 6.1-7.24, 8.18*)

²¹ Pio wanímé pikísah tahnsáne. Itega meweúna wanímé naho Nóah míotaq pio wání tahnsane. Íre itene inonkataté náwíq sorahruveyabe wání meyone. Írakaumo. Ite wání meyonaraq iwíáhéq, Sísa Karáhé iriwe organukúnsabe ahriahri wene sánsá sehginauge iwíáhúne.

²² Sísa Karáhéga íópeq pokéna Maniká Iteribone ayah púpeq ména moke íópeqté kéreq mibeqté wáhnáh kéreq wahnhnarítéhre.

4

Itene irupipeqté áhbábáq íwíáh moke súáhro i ehwéhne.

¹ Sísa Karáhéne anonka érútaq wega iwíáhú serahnoro. Wene anonka éri anínká íre ahbabáq aruqarurire.

² Wega mah marákóípéq míéh tánáhráq wene ahbabáq iwiáh íre sehgíre. Írakaumo. Wene ahbabáq suena Maniká awahbeh sansánire.

³ Menahmé itega Sísá íre tagariáh kégá ahbabáro serahnurowe. Menah itega mó kené ahre weh abariéq íre kaweq iwiáhquéq píah naro-taq múguwahgu agéq Manikáne ehweh anterueq péhepehe maníkánsabé iwiáh iwiáh arítárowe.

⁴ Amahnága Sísá íre tagariáh kégá mi ahbabáq sánsámári miraotaq itega sereq moraráq íre miraonsabé sega áhtenéra itensabé íehruruowe.

⁵ Mókake Maniká anotah sahsí anínká ehweh aritahnaraq sega irigue sene ahbabáqmari pahsuagéhe. Wega moke oga míáh kéreq pusa kéreq ehweh aitená sainsuanawire.

⁶ Minayabe moke pukuro ke oga míáhtáq mó kegá Manikáne ehweh teri terinuwara írówe. Maniká oga míá míá inserahnigeheéra teriuwara írówe. Irera ahbabáq kega onserahnéra sinonka pukuwe.

We séhréh atéhoro i ehwéhne.

⁷ Moke náneq parabagína tanáhráq aiq wah-tonire. Kauerue púreronehboq tabasíwe méq tábúsoqme iwiáhoro.

⁸ Kiotaiki sansá teiníboq íráhro. Moke Sísá tagariáh ánímári wensabé wensabé irutaboiratéhoro. Irutaboirinaraqmé mó anínká are ahbabáq atahnaraqmé arega íre iwiáhue ahreraq matiankehe.

⁹ Maniká tagariáh kégá iteba sirataq kauerue séhréh ariteq iru eyoyóue wenáwíoro. Mirairataqmé mi keyabé íre síehruru arítáhro.

10 We tagaríah ké séhréh aritageheéna Manikánka itensabé arutaboiréna morání moráníne kaweq naneq íátáire. Kaweq naneq íátáinsabé wene sánsá kawerue sehgieq we séhréh atéhoro.

11 Manikánka, Néne ehweh terio atéh anínká wene ehweh tábúsoqme irarinkehe. Séhréh ariteh anínká Manikánka págege atahnana séhréh aritankéhe. Mirairataq tagehra kegá iwíahéra, Sísa Karáhéne sansá aiq kaweq sansáne éra Manikánsabe iwíah iwíah atagéhe. We anotah anínéna áhnte págege aní mía míai puaq wensabé ahriahri iwíah iwíah atanéhe. Aiq miraoneheqqmúne.

Sísa áwíoqnonserah ite moq íwíoqnagehe i ehwéhne.

12 Néne iyahnabo anímáríno, itensabé nirutaboiruge. Íre kaweq sunúq ite áhwáré tanahráq sínaraq áhteniyeho. Íre kaweq sunúq áhwáreh naneqka peh morá ínéba sire íwíáhiyeho. Írakaumo.

13 Mó kegá Sísa Karáhé áwíoqnonserah ite íwíoqnehrataq iwíah iwíáhoro. Minayabe wega tuinaraq itene irupipeq eyoyóínaq iwíah iwíáhighehe.

14 Itega Sísa Karáhéne sansá sehgónsábé mó kegá íre kaweq ehwéh aitéhrataq iru ukiqme míáhro. Manikáne Awa págege kiotaiki anínéna iteba mía míai puaq iru eyoyóue míáhro.

15 Mó aní subiq suewé, aebówé, ahkaragárawe, mina tahnsa ahbabáq íre miraoro. Íre itereq wehgaq mire pehragahro. Itega mina tahnsa

ahbábárotaq mó kegá kamah aiémé minawé áhnte iyehiteh sansáne.

16 Ite Sísa tagariáh ké míáhnsábé mó kegá íwíoqnehrataq minawé íre iyehiteh sansáne. Mó kegá ite Sísa Karáhéne animárí móe aitáhnsábé iyehitegurégúiyehboq peh Manikánsabe iwíáh íwíáh atáhro.

17 Ehweh aite tanahráq aiq sire. Mi tanáhráq ite Manikáne animárípá ebeq áhwáranae. Anehemé Manikánka wene kaweq ewhéh anterúáh ké ehweh aritena anotahtaq kamah arí mino.

18 Minayabe Manikáne ehwehnka aiq mahraréna,

Tábúsoráh ké kawerariteyabe págege sansáne.

Manikánsabe suwahrieh ahbábáq kewé árahiro? Árahue kaweraritankéhbo úwe.

(Sindaun 11.31)

19 Manikánka kowe aritahnara mó kegá íwíoqnehrataq peh kaweq sansá miraeq Manikánsabe, Arensabé aiq pútare ateq arene sánsá sehgoneheqmúne teawéro. Teawirataqmé wega kawerue wahnahnaitankéhe.

5

Sísa tagariáh kéráq wahnahnarite ewhéhne.

1 Sísa tagariáh kéráq wahnahno keo, ehweh teiníboq írátíáhro. Íné moq Sísa tagariáh kéráq wahnahnú aní múge. Sísa Karáhé awankátaq érúwana pukútaq niuranka tagahwae. Wega tuiña tanáhráq kaweq naneq náiená anotah aníména kawerue wahnahninkehe. Minayabe Sísa tagariáh ké kawerue wahnahnarítáhro.

² Sipisípiq wahnáhnká wene kamári wahnahninserah ite moq Maniká tagaríáh kéráq kawerue wahnahnarítáhro. Wehukega pagu pagunonsabé mi arámbéhrí mirainie íwíáhiyeho. Peh Manikánka miraoro aitéhnsábé we tagaríáh kéráq kawerue wahnahninie íwíáhoro. Mi arámbéhríunsabé ápeq meyaníe íwíáhiyehboq peh mi arámbéhríyábé irutaboirue miraoro.

³ Mah marákóípéqté wáhnáh kégá págegeue wahnahno serahniyehboq pehwehrue méq kawe q sansánirataq itega wahnahnarítáh kégá tagéra sega moq pehwehrue méra kawe q sansánigehe.

⁴ Mirairataq kiota iqme wahnáh tuinaraq wega itensabé, Kawerowe aitankéhe. Mi tanáhráq wega náina naneq íre parabagia peh ahriahri kagainawire.

Manikánka píribahri ke íre séhréh aritankéhe i ehwéhne.

⁵ Mahbigaunseq o menahwénsónsero, Sísa tagaríáh kéráq wahnahno kené ehweh íráhro. Ite ómi píribahri sansá sueq mó kené ehweh ireq we séhréh atéhoro. Minayabe Manikáne ehwehnka mahraréna,

Sensíwíq pankeráh kewé Manikánka íre séhréhia peh ahqáho arítéhre. Sensíwíq íre pankeráh kewé Manikánka séhréh arítéhre ire. (*Sindau 3.34*)

⁶ Minayabe iteitene iuwahbeh iwíáh sueq Manikánsabe, Wahnahnainte séhréh ainto teawírataq wewega iwíáhína tanáhráq anotah aní míahno aitankéhe.

⁷ Wega itensabé arutaboiraitéh púaq moke ite iwíáh kikiro naneq teawéro.

Owainawansabé anotahtaq ahqáho atáhro i ehwéhne.

⁸ Itene naruo anímé owainawane. Anotah pusí tahnsa kanká wah pawe nanieéna ahkabaqmena nogínserah wega wehuke ahbabáq aitanieéna ahkabaqmena nogíre. Minayabe áwéh panantágínaq tagaríahro.

⁹ Sísansabé aiq pútare ateq owainawansabé anotahtaq ahqáho atáhro. Ite tagarionawe íre itebataq moke mah marákóípéq Sísa tagariáh ké moq síwíoqnehrara siru umehire. Owainawanka íwíognáhnaraq minayabe iwíahhéq wensabé ahqáho ataataoro.

¹⁰ Ahriahri Sísa Karáhéréq ogá mérapeq mía míageheéna Manikánka itensabé arutaboiréna omaq itowe. Manikámé áhnte séhréh aitéh ánine. Minayabe wahto tanahráq iru umeh agínana Manikánka ite kaweqtaq míageheéna anotahtaq págege aitankéhe.

¹¹ We ahriahri págegeue kiotaiqme aní mía míaire. Aiq pútaq ehwehne.

Páhsí parabaginai ehwéhne.

¹² Sísa tagariéh ání wenáwíq Sáírae. Íné tagariómé wega Sísame sásá kawerue sehgíre. Mah karíq páhsí sehiraninie ugana wega íné séhréh aintéhre. Ite kaweq iwíah aitanieéna Manikánka séhréh aitéh éhwéh sehiranue teiúge. Wene aiq pútaq sansá kawerue sehgóro.

¹³ Pábíroní suwahpeqte Sísa tagariáh kégá itensabé iroro ewe. Manikánka se moq omaq sitowe. Nánibáq Máhkaga moq itensabé iroro ire.

14 Moke mibeqté Sísa tagariáh kékabé
irutaboiréq we mehwéh atéhoro.

Ite Sísa Karahéreq mía míao puana Manikánka iru
ukiq itéhre.

**Manikáne O Ehwehne
God's New Talk: The New Testament in the Awa
Language of Papua New Guinea
Nupela Testamen long tokples Awa long Niugini**

copyright © 1974, 1997 Wycliffe Bible Translators, Inc.

® Faith Comes by Hearing

Language: Awa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

PDF generated using Haiola and XeLaTeX on 28 Dec 2024 from source files dated 31 Aug 2023

9673cf68-887a-574e-9ac8-846469c86b12